

Il patriziat dal temp da la Veglia Republica

Las famiglias dominantas en survista, part 3

Jecklin (von Hohenrealta)

Famiglia aristocratica dal Grischun che deriva presumadamain da la Tumleasta, che vegn dentant menziunada per l'emprima giada en l'Engiadina il 1400 cun Bertramus Jecklin da Zuoz. En il 15avel e 16avel tschientaner ha ella mess ina seria da notars en l'Engiadin'Ota. Exponents da la famiglia han occupà repetidamain uffizis da l'uestgieu sco maiordoms, landfocts da Riom e Farschno e chapitanis sin la Fürstenburg en il Vnuost. Els èn era stads mess da las Trais Lias ed han servì en las truppas imperialas austriacas. Els han dentant occupà mo darar l'uffizi dal landamma da l'Engiadin'Ota.

Conradin il Vegl, landfoct da Riom 1452–62, pli tard en servetsch dal cont Jörg von Werdenberg, maridà cun Catharina de Pratval, ha creà la basa patrimoniala da la supremazia dals Jecklin en la Tumleasta ed è stà il progenitur da quest rom. Fin en il 19avel tschientaner han ils Jecklin mess pliras giadas il mastral dad Ortenstein. Suenter avair obtegnì il titel da noblezza da l'imperatur Maximilian I (1510), ha l'archiduca Ferdinand II extendì quel il 1581 per Conrad, curatur al chastè da Tarasp, sco era per ils frars e cusrins da quel ed ha agiuntà il predicat von Hohenrealta. L'emprim proprietari tschert dal chastè-fortezza da Munt Son Gion/Reziòlta è Conradin, prer ad Almen e Roten e pli tard plevon reformà a Tusaun e Scharons. Rudolf Ruinell, fundatur dal fidei-commiss da Reziòlta, ha occupà, sco ses numalin Rudolf Ruinell, uffizis publics en Vuclina. Noli Paulin (1623–79) da Zuoz, plevon ad Aschera, maridà cun la figlia dal landamma Biäsch à Porta, ha fundà la lingia d'Aschera. Burgais da Cuira èn daven-tads il 1606 Hans Jakob, landfoct da Farschno, ed il 1838 Constanz, commerciant, chapitani e cusseglier, bab da Constanz e da Fritz. La lingia engiadinaisa è s'estinguida en il 18avel tschientaner.

Ursula Jecklin

Von Juvalta

Famiglia nobla da ministerials dal chapitelatedral da Cuira dal 12avel–16avel tschientaner ch'ha appartegnì dal 16avel–18avel tschientaner a l'aristocrazia da las Trais Lias. Attestada per l'emprima giada il 1140. Ils Juvalta derivan da la Tum-



Il chastè dad Innerjuvalt deriva da ca. 1250.

leastga, nua ch'els possedeavan en il 12avel e 13avel tschientaner ils dus chastels da Hoch- ed Innerjuvalt ed il domini feudal sin la Mantogna da Sched (cun bains a Veulden, Roten, Tumegl, Almen, Pasqual e Scharons). Lur origin n'è betg cler. Tranter il 1150 ed il 1300 han exponents da la famiglia fatg part regularmain dal chapitelatedral da Cuira. En il 14avel e 15avel tschientaner han insaquant Juvalta occupà uffizis administrativs en la Tumleasta, tranter auter quel dal vice-dominus, ma sur ils cunfins regiunals ora n'è nagin member da la famiglia attestà en posiziuns analogas. Ils Juvalta eran parentads cun autras famiglias noblas da ministerials dal chapitelatedral da Cuira e cun famiglias dal medem stan da la Svizra Orientala. En il chapitelatedral da Cuira n'eran els betg ils exponents principals da lur classa sociala. En il 15avel tschientaner ed a l'entschatta dal 16avel tschientaner han els cedi lur bains en la Tumleasta ed èn sa stabilids a Zuoz en l'Engiadin'Ota, nua ch'els èn s'int-

grads en la classa dirigenta locala. Gia a l'entschatta dal 14avel tschientaner eran els sa parentads cun ils von Planta, la famiglia la pli influenta en l'Engiadin'Ota. Proprietaris da bains a Samedan en il 14avel tschientaner, han els possess en il 15avel tschientaner a Zuoz ina tur d'abitare ed ina chasa.

Suenter la fin dal domini episcopal han ils Juvalta continuà a far part da la classa dirigenta da la Lia da la Chadé, e quai fin al declin da la Republica da las Trais Lias il 1798, era sch'els n'han mai appartegnì al tschertgel pli elitar da l'aristocrazia grischuna. Sporadicamain han intgins da lur members occupà auts uffizis en la Republica ed en las Terras subditas, uschia Scipio (gubernatur en Vuclina), auters èn stads vicaris (2) e podestats (3). Era en l'Engiadin'Ota èn ils Juvalta restads en la sumbriva da las famiglias Travers e Planta ed han occupà mo darar l'uffizi dal landamma da quella val. Els èn stads funcziunaris communalis a Samedan e notars, ma n'èn betg reussids a far carriera sco schuldads en servetsch da pussanzas estras (en spezial da la Spagna, Frantscha ed Austria). A partir dal temp modern tempriv èn els sa parentads quasi exclusivamain cun famiglias da la classa dirigenta da l'Engiadin'Ota. L'exponent il pli impurtant dals Juvalta è stà il cronist e politicher Fortunat. In rom da la famiglia viva dapi il 19avel tschientaner en l'Italia dal Nord. Wolfgang ha acquistà en il 19avel tschientaner il chastè dad Ortenstein en la Tumleasta.

Peter Conradin von Planta

Von Raschèr

Famiglia dirigenta da Zuoz. L'emprim member attestà è Johann Martin (1483–1573), menziunà il 1550 en in document da nobilitaziun conferì ad el tras l'imperatur Carl V. Il 1580 è la famiglia Raschèr sa spartida confessionalmain. La lingia catolica è sa translocada a Vienna. Hans, biadi da Johann Martin, è stà il progenitur da la lingia pli veglia da Cuira, estinguida il 1810. Ses frar Peter è stà uestg da Cuira dal 1581–1601. Il 1569 è mort Jodocus, il davos prer catolic a S-chanf. La famiglia Raschèr ha occupà divers uffizis da la citad da Cuira, ha mess in gubernatur e plirs podestats en Vuclina sco era, cun Johann Simeon, ovg giadas il chau da la Lia da la Chadé tranter 1670–85. Il 1797 è vegnì naturalisà Wolfgang da Zuoz a Cuira; el è il progenitur d'ina lingia pli giuvna ch'ha schendrà medis, plevons ed uffiziers en servetsch napolitan. La sedia da famiglia al Türligarten sa

chatta en la part sid da la citad. Ils Raschèr èn s'alliads tras maridaglia tranter auter cun ils Plantas, Salis, Juvaltas ed Albertinis.

Max Hilfiker

Travers

Famiglia da Zuoz che deriva da la classa superiura purila, avanzada oravant tut tras ses rom dad Ortenstein fin a la mesadad dal 17avel tschientaner ad ina da las schlattas las pli influentas dal Grischun, entant che la lingia da la Val Müstair, fundada a l'entschatta dal 16avel tschientaner, n'è betg pli documentabla a partir da l'entschatta dal 18avel tschientaner. A l'origin è la famiglia sa distinguida en il notariat, alura adina pli era en uffizis politics ed en servetschs mercenars. En il 18avel e 19avel tschientaner han ils Travers pers lur influenza ed èn daven-tads pli e pli povers. A l'entschatta dal 20avel tschientaner è la famiglia s'estinguida.

Tenor la legenda eran ils Travers vegnids destituids sco ducats da Ravenna e bandischads dal pajais. En documents cumparan els l'emprima giada il 1431 cun Jakob sco derschader da cumpromiss resident a Zuoz. Il 1462 è attestà in Travers delegà da S-chanf sco perditga tar la Brev dals tschintg sigils. Janutt, il figl da Jakob, ha represchentà l'Engiadin'Ota sco jurisdictur en conflicts cun l'uestg da Cuira. A partir da la fin dal 15avel tschientaner fin viaden la segunda mesadad dal 17avel tschientaner han ils Travers mess numerus notars en l'Engiadin'Ota. Il 1521 è Peter vegnì elegi, sco emprim da sia famiglia, landamma da l'Engiadin'Ota; per cuntanscher l'elegibilitad ha el però stuì sa procurar in diplom da noblezza imperial. Fin la mesadad dal 17avel tschientaner han ulteriurs exponents dals Travers occupà quest uffizi predominà dals Plantas. En il 16avel tschientaner han els occupà 10 giadas, en il 17avel tschientaner sis giadas ed en il 18avel tschientaner anc ina giada in dals uffizis ils pli auts en Vuclina. Divers members da la famiglia èn stads en servetschs franzos. Remartglamain dera-sada era la scolaziun superiura, mo per il 16avel tschientaner sa laschan documentar nov Travers sco students.

L'ascensiu a la classa aristocratica dirigenta aveva la famiglia d'engraziar probablmain en emprima lingia a la politica matrimoniala raffinata sco era a Gian, progenitur da duas lingias da Zuoz e d'aveva entonconschent sco reformatur. Tras il matrimoni da ses figl Jakob (1505–56) cun Anna Büchler èn ils Travers vegnids

en possess dal chastè dad Ortenstein. Jakob è stà chapitani en servetsch franzos, maiordom episcopal, mastral dad Ortenstein e gubernatur en Vuclina. Ses figl Johann (1530–1608) è muntà socialmain tras il matrimoni cun Lucretia von Schauenstein. Tras ils figls da quel, Johann Rudolf e Johann Victor, è la famiglia s'establida en la classa dirigenta grischuna. L'emprim era maridà cun la figlia da Pompejus von Planta, assassinà il 1621, ed è daven-tà tras questa alianza cumpossessor dal chastè vischin da Rappertg. L'influenza da la famiglia en il Grischun è sa diminuida en la segunda mesadad dal 17avel tschientaner. Prioritad avevan ussa ils servetschs mercenars e main ils uffizis indigens. Dirigids dal general Johann Viktor, han ils Travers empruvà invanamain da rinforzar anc ina giada lur posiziun politica en l'Affar da Tumegl purtà ora en la segunda mesadad dal 18avel tschientaner. En il 19avel tschientaner ha l'indebitament dad Anton Victor accelerà era il declin finanziar da la famiglia.

Silvio Färber

Von Mohr [Moor]

Schlatta da vasals da noblezza bassa dal chapitelatedral da Cuira, derivanta da l'Engiadina Bassa, nua ch'ella è attestada per l'emprima giada il 1280. Il stan originar dals Mohr n'è betg enconuscent, igl è dentant pussaivel ch'els eran ministerials dal chapitelatedral da Cuira. Els residivavan a l'entschatta a Zernez, nua ch'els possedeavan ina tur da crap, construida probablmain enturn la mesadad dal 13avel tschientaner. Relaziuns cun las famiglias noblas libras e bainstantas da Zernez (Wildenberg) n'èn betg attestadas. Els eran percurter gia en il 13avel tschientaner vasals dals chastellans von Matsch. A Zernez eran ils Mohr probablmain rivals dals Plantas.

Per il 14avel e 15avel tschientaner disponan ins d'ina documentaziun pli ampla davart ils Mohr. Els han occupà repetidamain uffizis episcopals e feudals en l'Engiadina Bassa, numnadamain quel dal mastral ed, a partir dal 15avel tschientaner, l'uffizi dal derschader e dal chastellan sin il chastè da Tschaniuff (Ramosch). Quest uffizi partivan els facticamain cun ils Plantas. Il 1311 è attestà in Mohr sco chavalier, auters exponents da la famiglia da quel stan n'èn betg documentads. L'impurtanza dals Mohr durant il temp medieval tardiv resta limitada al rom local. Els na faschevan betg part da las famiglias da chavaliers dominantas dal chapitelatedral da Cuira.

En il 16avel tschientaner ha la famiglia appartegnì a la classa superiura da la vischnanca, ella n'ha dentant mai obtegnì caricas pli impurtantas ni en il Grischun ni en Vuclina. Mo ad in rom, probablmain catolic, èsi reussi da meglierar fermamain l'atgna posiziun sociala en il servetsch da l'Austria tranter la fin dal 16avel tschientaner e l'entschatta dal 17avel tschientaner (Maximilian). En il 17avel tschientaner ha il rom catolic da Zernez mess in uestg da Cuira (Joseph) ed in provost dal chapitelatedral da Cuira (Conradin), entant che la lingia reformada da Susch ha schendrà en il 19avel tschientaner plirs plevons reformads e dus istorichers (Theodor, Peter Conradin).

Peter Conradin von Planta



Joseph Mohr, uestg da Cuira 1627–1635.

Lexicon Istoric Retic

Il LIR cumpiglia bundant 3100 artgels (geographics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.